

“PENGORBANAN”



Musim hujan telah berlalu dan di mana-mana kelihatan daun-daun menghidu. Kelihatan seekor ulat di antara dedaun menghidu. Sang ulat bergoyang-goyang diterpa angin. Dengan tiba-tiba, Sang ulat berkata, “Apa khabar daun hijau?” Tersentak daun hijau menoleh ke arah suara yang datang “Oh, kamu ulat. Badanmu kelihatan kurus dan kecil, mengapa?” tanya daun hijau. “Aku hampir tidak mendapatkan dedaunan untuk makananku. Bolehkah engkau membantuku sahabat?” kata ulat kecil. “Tentu... tentu boleh... dekatlah kemari.” Daun hijau berfikir, “jika aku memberikan sedikit dari tubuhku ini untuk makanan si ulat, aku akan tetap hijau. Hanya aku akan kelihatan berlubang-lubang sahaja. Tapi tak apalah.” Perlahan-lahan ulat menggerakkan tubuhnya menuju daun hijau.

Setelah makan dengan kenyang ulat berterima kasih kepada daun hijau yang telah merelakan bahagian tubuhnya menjadi makanan sang ulat. Ketika ulat mengucapkan terima kasih kepada

sahabat yang sangat pemurah dan sanggup berkorban itu, ada rasa tenang dan puas hati di dalam diri daun hijau. Sekalipun tubuhnya kini berlubang di sana-sini namun ia bahagia dapat melakukan sesuatu bagi ulat kecil yang lapar.

Apa yang kita dapat lihat dari kisah ini adalah mengenai asam garam kehidupan di mana, ada kalanya kita akan menjadi “ulat kecil” yang menerima kebaikan orang dan ada kalanya kita menjadi “daun hijau” yang senang memberi. Namun, perasaan sebagai pemberi dan penerima tidak akan sama. Apabila kita menerima bantuan daripada orang, kita akan rasa menghargai pertolongan tersebut. Namun jika kita yang memberi, kita akan dapat merasakan kepuasan dalam diri kerana dapat membantu orang lain di dalam kesusahan. Jadilah kita seperti daun hijau yang baik mewakili orang yang masih mempunyai “hati” yang tidak menutup mata ketika melihat orang lain dalam kesulitan, tidak membelakangi dan seolah-olah tidak mendengar ketika orang lain berteriak minta tolong serta rela melakukan sesuatu untuk membantu dengan mengabaikan kepentingan diri sendiri buat seketika.

Pengorbanan mempunyai pengertian yang cukup meluas, ia tidak sekadar berupa tenaga dan wang ringgit, bahkan masa, perasaan dan sebagainya. Setiap pengorbanan itu mempunyai pengertian dan kisah tersendiri. Walaupun kadangkala perit untuk melakukannya, tetapi pengorbanan perlu dilakukan demi orang yang disayangi. Marilah kita hayati salah satu daripada kisah mengenai sebuah pengorbanan.